

詩
氏
族
考

詩氏族考卷第六

嘉興 李超孫 輯

周頌

雝

太祖

鄭箋太祖謂文王

正義曰文王雖不得爲始祖可以爲太祖

皇考

鄭箋皇考斥文王也

烈考

毛傳烈考武王也

正義曰卽洛誥所云烈考武王宏朕恭一也

文母

毛傳文母太姒也

正義曰文母繼文言之雖太姒自有文德亦因文王而稱也

列女傳太姒號曰文母文王理陽道以治外文母理陰道以治內

世本古義烈考卽文王也文母毛云太姒蓋烈以功稱文從夫諡

載見

昭考

毛傳昭考武王也

有客

微子

小序

古今人表列上中

史記帝乙長子曰微子啟啟母賤不得嗣少子辛辛母正后辛爲嗣紂旣立不明淫亂于政微子數諫不聽度紂終不可諫欲死之及去乃問于太師少師太師若曰今誠得治國國治身死不恨爲死終不得治不如去遂亡

正義曰微采地名微子啟紂同母庶兄也武王投之于宋因命之封爲宋公代殷後承湯祀是也微子之命由微子先封于宋未得爲殷後于此時命爲宋公故作此

命辭或召來命之或遣使就命史傳無文要是既受命乃來朝而見也

新論微子傷殷之將亡終不可奈何見鴻鵠高飛援琴作操其聲清以浮

人表考微子紂庶兄微國名子爵路史作魏子名啟又作開避景帝諱殷帝乙之首子也國于宋爲上公周書曰殷

公葬梁國薄縣城西元至元六年封爲仁靖公小司馬謂古書

多用魏字作微而殷紀微子索隱亦云家語微或作魏讀從微音此路史所本也

按大明疏云微子之命及左傳皆謂微子爲帝乙之元子而紂得爲正適者鄭注書序云微子啟紂同母庶兄紂之母本帝乙之妾生啟及衍後立爲后生紂

據此微子之母始爲妾後爲后生紂如史記言啟母
賤辛母正后則微子與紂似非同母矣

又按尙書微子自言耄遜于荒論語亦曰微子去之
是殷未亡時微子已去矣史記謬云武王伐紂克殷
微子持其祭器造于軍門肉袒面縛左牽羊右把茅
膝行而前以告于是武王乃釋微子復其位面縛之
說乃楚人以誑莊王受鄭伯之降耳未可憑信王伯
厚亦云微子已行則武王伐商之際何反歸于國以
自取面縛之辱攷左傳微子適周乃在克商之後武
王旣投殷後于宋至成王黜殷命殺武庚命微子啟
代殷後作微子之命于其來朝也則作有客之詩當

是周公攝政二年時事詩稱有客卽書所謂作賓也

絲衣

高子

小序

古今人表列中上

正義曰高子者不知何人公孫丑稱高子之言以問孟子則高子與孟子同時趙岐以爲齊人此言高子蓋彼是也

按朱竹垞著孟子弟子考稱高子朱贈泗水伯引趙岐云高子齊人嘗學于孟子究未審其何人困學紀聞引徐整云子夏授詩高行子卽詩序及孟子所謂高子也以絲衣繹賓尸爲靈星之尸以小弁爲小人之詩則失其義矣據此高子知是高行子也

魯頌

駟

僖公

小序

古今人表列中中作魯釐公

魯僖公名申莊公之子母成風閔公庶兄在位三十三年諡法小心畏忌曰僖

三十三年左傳冬公如齊朝且弔有狄師也反薨于小寢卽安也

按僖公于齊桓二十七年立卽結好于齊屢隨壇坫自會櫟至會淮凡十與盟會此由僖公知齊之可倚而善自圖治者也自十七年齊桓旣沒至二十五年晉文公立僖公遂有卽楚之漸蓋觀以楚師伐齊取

穀及會諸侯盟宋以結楚好而知僖公之業衰矣其
與晉文同會者不過踐土之盟溫之會翟泉之盟已
耳僖公爲魯之令主能如處齊桓之世內外交修何
難隆隆日起而卒未竟其業惜哉頌所稱尊賢祿士
新祖廟修泮宮以至牧馬復舊諸事與夫服淮獻馘
之功雖未免過于揚美然使文能承父之志僖公之
業可成矣聖人于此有微意焉

伯禽

小序

古今人表列中中作魯公伯禽

公羊傳封魯公以爲周公也周公拜乎前魯公拜乎後
曰生以養周公死以爲周公主
史記周公相成王而使其子伯禽代就封于魯周公戒

伯禽曰我文王之子武王之弟成王之叔父我于天下亦不賤矣然我一沐三捉髮一飯三吐哺起以待士猶恐失天下之賢人子之魯慎無以國驕人 魯公伯禽之初受封之魯三年而後報政周公周公曰何遲也伯禽曰變其俗革其禮喪三年然後除之故遲太公亦封于齊五月而報政周公周公曰何疾也曰吾簡其君臣禮從其俗爲也及後聞伯禽報政遲乃歎曰魯後世其北面事齊矣

說苑昔成王封周公辭不受乃封周公子伯禽于魯將辭去周公戒之曰去矣子其無以魯國驕士吾聞德行廣大而守以恭者榮土地博裕而守以儉者安祿位尊

盛而守以卑者貴人衆兵強而守以畏者勝聰明睿智而守以愚者益博聞多記而守以淺者廣此六守者皆謙德也夫貴爲天子富有四海不謙者先天下亡其身桀紂是也可不慎乎故易曰有一道大足以守天下中足以守國家小足以守其身謙之謂也夫天道毀滿而益謙是以衣成則缺衽宮成則缺隅屋成則加錯示不成者天道然也其戒之哉無以魯國驕士矣

尙書大傳伯禽與康叔見周公三見而三笞康叔有駭色謂伯禽曰有商子者賢人也與子見之乃見商子而問焉商子曰南山之陽有木焉名曰橋二三子往觀之見橋實高高然而上反以告商子商子曰橋者父道也

南山之陰有木焉名曰梓二三子復往觀焉見梓實晉
晉然而循反以告商子商子曰梓者子道也二三子明
日見周公入門而趨登堂而跪拂其首勞而食之曰爾
安見君子乎

呂氏春秋伯禽將行請所以治魯周公曰利而弗利也
竹書紀年成王十一年王命周平公治東郊沈約注周
平公卽君陳周公之子伯禽之弟

帝王世紀伯禽以成王元年封四十六年康王十六年
卒

人表考魯公伯禽周公子左傳曰禽父竹書曰魯侯禽
父在位四十六年葬曲阜南七里

按闕宮疏引洛誥說周公攝政七年十有二月歸政
成王之事經云歲文王騂牛一武王騂牛一王命作
冊逸作冊告周公其後注云歲成王元年正月朔日
祫祭文武于文王廟使逸讀所作冊祝之書告神以
周公其宜爲後者謂將封伯禽則是成王卽政之元
年正月朔日封伯禽也說與世紀合

季孫行父

子小序

古今人表列上下作魯季文

鄭箋季孫行父季文子也

正義曰行父是季友之孫故以季孫爲氏諡曰文子左
傳世本皆有其事

穀梁傳季孫行父禿

史晉世家云魯使蹇

襄五年左傳季文子卒大夫入斂公在位宰庀家器爲葬備無衣帛之妾無食粟之馬無藏金玉無重器備君子是以知季文子之忠也相三君而無私積可不謂忠乎

鹽鐵論季文子相魯妾不衣帛馬不秣粟孔子曰不可大儉極下

繹史魯以慶父之亂再世不甯季子起而平內難大義滅親援立新君卒能佐霸成功爲魯國之令主其孫行父復請周作頌闡揚君德亦可謂善繼善述矣

劉克曰言詩之難其人其閒亦有甚可疑者案左氏傳季孫行父以襄公五年卒不以壽聞者也姑以七十歲

言上族卷第六
爲準在僖公薨年纔十有一歲安有八九歲之兒顧乃
請命于周用前代未有之典出于諸卿之右哉

閻若璩曰論語政逮于大夫四世文子武子平子桓子
魯文公薨君于是失國政在季氏季氏者文子也若武
子始專國武子立襄五年耳上溯宣元年凡四十一年
政將誰歸乎悼子未執政蓋死于武子手故經未書其
卒孔注之誤則以無處位置悼子故自桓子上數四世
至武子止矣若知季氏中少一世種種皆合

人表考世本云魯季友生仲無佚無佚生行父行父葬
沂州蘭山縣西南神峰山下 案左穀注竝云行父季
友孫周語注亦云文子季友之孫齊仲無佚之子而檀

弓疏云公子友生齊仲齊仲生無逸無逸生行父誤分爲二人齊蓋其諡也齊仲不見經傳疑行父以孫繼祖如季平子之嗣武子與

按行父厯相文宣成三君而以忠儉著名可謂賢矣然自是私強公弱東門歸父謀去三桓行父卽修怨以逐東門氏莒僕弑君而以寶玉來奔則當以逆順告君請君命以出諸境乃自使司寇出之可不謂自專乎宜其一傳至武子遂四分公室而專其二再傳而至平子竟肆逐君之惡詒謀不臧于是見矣

史克

小序

鄭箋史克魯史也

正義曰文十八年左傳稱季文子使太史克對宣公知史克魯史也文六年行父始見于經十八年史克名見于傳則克于文公之時爲史官矣然則詩作在文公之世行父請周不見于經以羣臣之心請王作頌雖告君乃行不稱君命以使非史策所得書也駟序云史克作是頌則四篇皆史克所作王肅曰當文公時魯賢臣季孫行父請于周而令史克作頌四篇以祀

泮水

臯陶

古今人表列上中作咎繇

陸德明曰臯陶唐虞之士官

春秋元命苞堯爲天子夢白虎遣馬喙子其母曰扶始

升高邱觀白虎上有雲感已生臯陶索扶始問之如堯言明于刑法罪次始終故立臯陶爲大理

白虎通臯陶鳥喙是謂至信決獄明白察于人情

文子臯陶喑而爲大理天下無虐刑有貴乎言者也

荀子臯陶之狀色如削瓜

論衡魍魎者一角之羊也性知有罪臯陶治獄其罪疑者令羊觸之有罪則觸無罪則不觸故臯陶敬羊起坐視之

困學紀聞淮南子曰臯陶瘡而爲大理此猶夔一足之說也臯陶陳謨賡歌謂之瘡可乎司馬公詩云法官由來少和泰臯陶之面如削瓜然荀子非相之言亦未必

然

人表考咎繇虞書今本作皐陶皐又作皐偃姓少昊之後荀子云狀色如削瓜抱朴子云面如蒙箕淮南子云馬喙而瘖易林曰陶叔路史曰瘖繇年百有六以壬辰日卒葬廬江六縣唐天寶二載尊爲德明皇帝

按秦風正義引秦本紀云秦之先帝顓頊之苗裔孫曰女脩女脩織元鳥隕卵女脩吞之生子大業大業取少典之子曰女華女華生大費與禹平水土又佐舜調馴鳥獸是爲柏翳舜賜姓嬴氏如本紀之言則益又名大費大費之父名大業列女傳曰皐子生五歲而贊禹曹大家注云皐子皐陶之子伯益也然則

、皐陶大業一人也中候苗興云皐陶之苗爲秦秦出伯益明是皐陶之子又考李邕爲李思訓碑云皐子贊禹皐與皐同亦以大業卽皐陶也

又按水經注偃師九山有百蟲將軍顯靈碑云將軍姓伊氏諱益字隤斂帝高陽之第二子伯益者也秦本紀亦以大業祖顓頊馬驢曰案大業是爲咎繇卽皐陶也其子柏翳卽伯益也宜祖少皞氏顓頊其母家爾又高陽八愷中有庭堅杜注卽皐陶字此據臧孫不祀之言爲證路史辯其非一人得之矣據此益信皐陶卽大業實少皞之孫其母家則帝顓頊高陽氏也

闕宮

令妻

詩補傳令妻謂聲姜也

公羊傳聖姜者何文公之母也

聲作聖古字通

高閼曰不稱僖姜而別爲之諡非禮也

文十六年左傳有蛇自泉宮出入于國如先君之數秋
八月辛未聲姜薨毀泉臺 十七年夏四月癸亥葬聲
姜有齊難是以緩

按春秋僖十一年夏書公及夫人姜氏會齊侯于陽
穀杜氏預曰婦人送迎不出門見兄弟不踰闕與公
俱會齊侯非禮十七年秋又書夫人姜氏會齊侯于

卞趙氏鵬飛曰婦人旣嫁從夫公不在而夫人出竟會齊侯此尤甚于陽穀之會是皆參譏之也唯汪克寬云魯頌稱聲姜爲令妻必無文姜之行張溥亦云聲姜魯夫人之賢者也書會齊侯爲男女遠嫌也此論甚正

壽母

詩補傳壽母謂成風也

公羊傳成風者何僖公之母也

何休曰風氏也任宿顓臾之姓

孫復曰成諡也

程端學曰妾母私諡亂禮甚矣

陸淳曰啖子云自成風之後妾母皆僭用夫人之禮
世本古義春秋僖八年秋七月禘于太廟用致夫人左
傳以爲致哀姜鄒氏非之謂哀姜注惡義與廟絕穀梁
以爲成風其說與劉向同而孫明復從之蓋成風爲妾
母初年未經廟見故于禘廟而因以致之爲後日祔廟
張本其稱致夫人猶後世之上尊號也或謂此夫人乃
僖公妻姜氏公羊傳僖二十年西宮災何休注僖公爲
齊侯所脅以齊媵爲嫡楚女廢居西宮則竊意夫人卽
聲姜而前此不書納幣送女者以原非正配也趙子常
疑聲姜是僖爲公子時所娶故昏禮不見于經今觀何
休以齊媵爲嫡之說或僖公先是所娶元妃已卒于未

爲君之日聲姜乃其繼室如惠公之聲子禘而致者昔
未廟見今乃廟見也僖公八年始用郊禘史克賦閟宮
正春秋禘太廟致夫人之年也其云令妻壽母以妻與
母疊稱當是婦姑必同與廟祭兼致崇號然則致夫人
禮與曰其致成風不失爲母以子貴所謂禮以義起變
之正也其致聲姜以媵于中宮之位則斷非禮也成風
薨于文四年聲姜薨于文十六年距僖公三十一年卜
郊時兩人尙無恙故詩人及之

按僖公爲閔之庶兄莊公妾成風所生也閔公是哀
姜姊叔姜之子叔姜當是哀姜之媵莊公于二十四
年娶哀姜二十七年叔姜生閔公而僖公爲其庶兄

然則成風之納應在數年之前其年當踰筭矣莊公至三十二年薨歷閔公二年僖公三十三年及文公四年春秋書成風薨約計六七十歲矣此頌所以稱壽母也

奚斯

古今人表列上下作魯公子奚斯

毛傳大夫公子奚斯作是廟也

正義曰閔二年慶父出奔莒左傳曰以賂求共仲于莒莒人歸之及密使公子魚請不許哭而往共仲曰奚斯之聲也乃縊是奚斯爲公子也如傳文蓋名魚而字奚斯

世本古義按左閔二年共仲使卜齋賊公于武闈成季

以僖公適邾共仲奔莒乃入立之以賂求共仲于莒莒人歸之及密使公子魚請不許哭而往共仲曰奚斯之聲也乃縊公羊傳亦云公子慶父弑閔公走而之莒莒人逐之將繇乎齊齊人不納却返舍于汶水之上使公子奚斯入請季子曰公子不可以入入則殺矣奚斯不忍反命于慶父自南浹北面而哭慶父聞之曰嘻此奚斯之聲也諾已曰吾不得入矣于是抗軫經而死據此二傳則奚斯乃慶父用事之人莊公薨慶父賊子般而立閔公此時慶父實主魯國故以作廟任奚斯

按左閔二年傳公子魚杜注云公子魚奚斯也毛傳言有大夫公子奚斯者或其時爲大夫也

又按韓詩章句曰奚斯作魯頌故班固兩都賦序云
奚斯頌魯采于孔氏王延壽魯靈光殿賦序云奚斯
頌僖歌其路寢揚雄法言亦曰正考甫嘗晞尹吉甫
公子奚斯嘗晞正考甫司馬公注謂正考甫作商頌
奚斯作閼宮之詩後漢曹襄傳奚斯頌魯注引韓詩
薛君傳云是詩公子奚斯所作此皆本韓詩之說王
伯厚已辯其謬攷是詩明言新廟奕奕奚斯所作是
奚斯作新廟非作魯頌也

商頌

那

成湯

小序

古今人表列上上作帝湯殷商氏

正義曰殷本紀云主癸生天乙是爲成湯案中候雒子命云天乙在亳注天乙湯名是鄭以湯之名爲天乙成湯非復名也自殷以上未有謚法蓋生爲其號死因爲謚耳謚法安民立政曰成除殘去虐曰湯以天乙有此行故號曰成湯

帝王世紀主癸之妃曰扶都見白氣貫月意感以乙日生湯故名履字天乙是謂成湯豐下銳上皙而有髯倨身而揚聲長九尺臂四肘

洛書黑帝子湯長八尺一寸珠庭

春秋元命苞湯臂四肘是謂神剛象月推移以綏四方白虎通湯臂三肘是謂柳翼攘去不義萬民蕃息

尙書大傳湯半體枯

墨子湯封于亳方地百里與其百姓兼相愛交相利百姓親之未沒世而王天下

新序湯見祝網者置四面其祝曰從天墜者從地出者從四方來者皆羅吾網湯曰嘻盡之矣非桀其孰爲此湯乃解其三面置其一面更教之祝曰昔蛛蝥作網今之人循序欲左者左欲右者右欲高者高欲下者下吾取其犯命者漢南之國聞之曰湯之德及禽獸矣四十國歸之

皇王大紀桀疾其大得諸侯和也召之囚于重泉夏臺太公金匱桀怒湯以諛臣趙梁計召而囚之均臺實之

種泉嫌于死湯乃行賂桀遂釋之而賞之贊茅

尙書中候天乙在亳諸鄰國襁負歸德東觀乎雒降三分璧黃龍雙躍出濟于壇化爲黑玉赤勒曰元精天乙受神福伐桀克三年天下悉合

後漢書湯克夏而大旱禱于桑林翦其爪磨其手以爲犧祝曰政不節邪使人疾邪苞苴行邪讒夫昌邪宮室營邪女謁盛邪何不雨之極邪

帝王世紀湯思賢夢見有人負鼎抗俎對已而笑寤而占曰鼎爲和味俎者割截天下豈有人爲我宰者哉初力牧之後曰伊摯耕于有莘之野湯聞以幣聘之

呂氏春秋殷湯討桀功名大成乃命伊尹作爲大濩歌

晨露修九招六列以見其善

騫子湯之治天下也得慶誦伊尹湟里且東門虛南門
嬖西門疵北門側得七大夫佐以治天下而天下治
人表考帝湯殷商氏名履又名天乙竹書曰商侯履潛
夫論曰子履五德志曰黑帝以乙日生虛之星精晝而
長顏以髯兌上豐下脩肱龜背臂再肘足左扁而右便
爲侯十七年爲天子十三年百歲崩都亳冢在濟陰薄
縣北

按湯以乙日生曰帝乙白虎通云殷道尙質故直以
生日名子世紀云商家生子以日爲名蓋自上甲微
始

戴公

小序

古今人表列中下作宋戴公

宋戴公名白哀公之子在位三十四年諡法愛民好治曰戴典禮不塞曰戴

正義曰宋世家云微子啟卒弟仲衍立卒子宋公稽立卒子丁公申立卒子湑公共立卒弟煬公熙立湑公子鮒祀殺煬公而自立是爲厲公卒子釐公舉立卒子惠公颺立卒子哀公立卒子戴公立自微子至戴公凡十君除二及餘八君是微子之後七世至戴公也世家又云惠公四年周宣王卽位戴公二十九年周幽王爲犬戎所殺考校其年宣王以戴公十八年崩是戴公當宣王時也

正考甫

小序

古今人表列上下作宋正考父

鄭箋正考甫孔子之先也其祖弗甫何以有宋而授厲公

陸德明曰正考父宋潛公之曾孫孔子七世祖

正義曰世本云宋潛公生弗甫何弗甫何生宋父宋父
生正考父正考父生孔父嘉爲宋司馬華督殺之而絕
其世其子木金父降爲士木金父生祁父祁父生防叔
爲華氏所偪奔魯爲防大夫故曰防叔防叔生伯夏伯
夏生叔梁紇叔梁紇生仲尼則正考甫是孔子七世祖
也

案家語本姓據世本弗父何生宋父周周
生世子勝勝生正考父此脫去世子一代

困學紀聞宋世家云襄公之時修行仁義欲爲盟主其

大夫正考甫美之故追道契湯高宗殷所以興作商頌
注韓詩章句美襄公考之左傳正考甫佐戴武宣世本
正考甫生孔父嘉爲宋司馬華督殺之而絕其世皆在
襄公之前安得作頌于襄公之時乎

詩補傳周用六代之樂故周太師有商頌而太史公謂
正考甫作其說本之韓氏今所存五篇皆言湯孫及武
丁孫子無一辭及宋則知太史公信韓氏之爲妄矣

曹氏曰自戴公至襄公凡一百五十有一年正考甫旣
佐戴公而能至于襄公之時作頌何其壽邪

正考父鼎銘一命而僂再命而偃三命而俯循牆而走
亦莫余敢侮匱于是鬻于是以餬余口

按史記宋世家襄公之時修行仁義其大夫正考父作商頌又云宋桓公卒太子茲甫立是爲襄公未葬而齊桓公會諸侯于葵邱襄公往會攷葵邱之會在魯僖公九年姑以襄公卽位之始而正考父作頌至魯襄公二十一年孔子生相距僅九十九年正考父于孔子爲七世祖豈中間世代俱十餘年之促乎又世本云正考父生孔父嘉魯桓公二年宋華督弑其君與夷公殤及大夫孔父宋人立公子馮爲莊公十九年卒子湣公捷立十一年南宮萬弑之弟桓公禦說立三十一年卒乃立襄公距殤公凡六十二年古者男子三十而娶正考父旣生孔父嘉孔父又爲督所

殺無慮四五十年矣自殤至襄又歷六十二年之久
正考父是時尙存已百有餘歲安得至是而作頌左
傳明言正考父佐戴武宣矣宣公十四年卒弟穆公
立孔父方爲大司馬先後時適相當微子至于戴公
禮樂廢壞魯語昔正考甫校商之名頌十二篇于周
太師以那爲首明是考甫校而非作矣

烈祖

鄭箋烈祖湯也

正義曰烈祖正謂成湯是殷家有功烈之祖也

湯孫

古今人表列上中作太甲

鄭箋湯孫太甲也

正義曰殷本紀湯生太丁太丁生太甲成湯嫡長孫也
以其追述成湯當在初崩之後太甲是殷之賢主湯之
親孫故知爲指太甲也

史記太甲居桐宮三年悔過自責反善伊尹迺迎而授
之政太甲修德諸侯咸歸伊尹嘉之作太甲訓三篇褒
帝太甲稱太宗

竹書紀年太甲名至元年辛巳王卽位居亳

繹史年表太甲太丁子在位三十三年或云十二年

世本古義按此湯孫指高宗也徧攷經傳唯高宗武丁
祭成湯見于尙書序及史記觀于高宗免喪弗言自謂
恭默思道此詩及烈祖二篇皆祀成湯之詩一則曰綏

我思成再則曰賚我思成與思道賚予之言相合

人表考太甲湯適長孫也在位十二年稱太宗葬濟南
歷城山上

按書序云成湯既沒太甲元年是無外丙仲壬之年
也邵氏經世亦無二君之年當是湯崩時外丙方二
歲仲壬方四歲太甲差長故立之鄭氏以太甲湯之
嫡長孫故謂湯孫爲太甲至烈祖篇孔疏述鄭以爲
此時祭者當是中宗子孫亦是湯遠孫故得言湯孫
初不定爲何人于殷武則鄭以湯孫爲太甲之等亦
不專主太甲李迂仲謂鄭氏以湯孫爲太甲非也卽
高宗也何氏楷曰案那及烈祖篇亦皆稱高宗爲湯

孫說自可存

烈祖

中宗

小序

古今人表列上中作太戊

鄭箋中宗殷王太戊湯之元孫也有桑穀之異懼而修德殷道復興故表顯之號爲中宗

正義曰殷本紀湯生太丁太丁生太甲崩子沃丁立崩弟太庚立崩子小甲立崩弟雍已立崩弟太戊立是太戊爲湯之元孫也

竹書紀年太戊名密元年丙戌

通鑑前編元年甲辰

書序正義太戊小甲之弟太庚之子

釋史年表太戊雍已弟在位七十五年

史記帝太戊立伊陟爲相亳有祥桑穀共生于朝一暮
大拱帝太戊懼伊陟曰臣聞妖不勝德帝其修德太戊
從之而祥桑枯死伊陟贊言于巫咸巫咸治王家有成
作咸艾作太戊帝太戊贊伊陟于廟言弗臣伊陟讓作
原命殷復興諸侯歸之故稱中宗

帝王世紀桑穀共生于朝太戊問于伊陟伊陟退而占
之曰桑穀野木不合生于朝意者朝亡乎太戊懼修先
王之政明養老之禮三年而遠方重譯而至者七十六
國

李樗曰商有三宗太甲爲太宗太戊爲中宗武丁爲高
宗烈祖則祀中宗元鳥則祀高宗太宗則無詩烈祖鄭

氏以爲成湯歐陽氏以爲太戊以此序言祀中宗也
人表考太戊湯之元孫後書曰殷戊此王中興故號中
宗葬大名內黃縣東南

元鳥

高宗

小序

古今人表列上中作武丁

鄭箋高宗殷王武丁中宗元孫之孫也有雉雛之異又
懼而修德殷道復興故亦表顯之號爲高宗

正義曰殷本紀太戊生仲丁及外壬及河亶甲亶甲生
祖乙祖乙生祖辛祖辛生祖丁祖丁生陽甲及盤庚及
小辛及小乙小乙生武丁是武丁爲太戊元孫之孫當
此之時殷衰而復興禮廢而復起高而宗之故謂之高

宗

竹書紀年武丁名昭元年丁未命卿士甘盤

繹史年表武丁小乙子在位五十九年

史記帝武丁卽位思復興殷而未得其佐三年不言政
事決定于冢宰以觀國風武丁夜夢得聖人名曰說以
夢所見視羣臣百吏皆非也于是迺使百工營求之野
得說于傅險中是時說爲胥靡築于傅險見于武丁武
丁曰是也得而與之語果聖人舉以爲相殷國大治
易乾鑿度孔子曰旣濟九三高宗伐鬼方三年克之殷
道中衰王道陵遲至于高宗內理其國以得民心扶救
衰微伐征遠方三年而惡銷滅王道成殷人高而宗之

詩氏族考卷第六

三 別下 廟校本

文王挺以校易勸德也

尚書大傳武丁祭成湯有雉飛升鼎耳而雉祖己曰雉者野鳥升于鼎者欲爲用也無則遠方將有來朝者故武丁內反諸己以思先王之道三年編髮重繹來朝者六國孔子曰吾于高宗彤日見德之有報之疾也

古今注雉尾扇起于殷世高宗時有雉雉之祥服章多用翟羽

人表考武丁名昭殷之賢王也德義高美殷人尊之故曰高宗抱朴子曰殷高在位五十九年葬陳州西華縣北

按帝王世紀云武丁有賢子孝己其母蚤死高宗惑

後妻之言放之而死天下哀之武丁爲殷一代中興之主修德行仁以復王道豈有聽讒殺子之事不可信也

武丁

李樗曰此詩祀高宗而指武丁者蓋以諱事神周人之制自周以前則未嘗諱也

世本古義武丁名昭武丁其字也工歌于祖考之前直呼其字古人之尙質如此

按解頤新語云周人以諱事神駿發爾私克昌厥後皆不諱何也蓋周之前無諱至書稱元孫某則諱之始也然不以其名號之耳不指其人則亦不諱如穆

詩氏族考卷第六

王名滿後有王孫滿襄王名鄭後有衛侯鄭匡王名
班春秋書曹伯班簡王名夷春秋書晉夷吾皆周之
故實也然則此祀高宗而直斥武丁尤見殷世尙質
故耳

長發

禹

古今人表列上上作帝禹夏后氏

大戴禮顓頊產鯀鯀娶于有莘氏之子謂之女志

吳越春秋

作女產文命

論衡禹母吞薏苡而生禹故夏姓曰姒

帝王世紀伯禹夏后氏姒姓父鯀妻修已見流星貫昴
夢接意感又吞神珠薏苡胸拆而生禹于石埭虎鼻大

口兩耳參漏首戴鉤鈐胸有玉斗足文履已故名文命

字高密

案史記以文命爲名孔安國謂禹爲名張晏謂禹爲字

禹繼鯀治水手足

胼胝故世傳禹病偏枯足不相過至今巫稱禹步是也
法言昔者姒氏治水而巫步多禹

淮南子禹耳參漏是謂大通興利除害疏河決江

尙書帝命期有人大口兩耳參漏足文履已首戴鉤鈐

胸懷玉斗分別九州隨山濬川任土作貢

吳越春秋禹以六月六日生 堯曰俞以固冀於此乃

號禹曰伯禹官曰司空賜姓姒氏統領州伯以巡十二

部 禹三十未娶行到塗山恐時之暮失其度制乃辭

曰吾娶也必有應矣乃有白狐九尾造于禹禹曰白者

吾之服也其九尾者王之證也塗山之歌曰綏綏白狐
九尾癭癭我家嘉夷來賓爲王成家成室我造彼昌天
人之際于茲則行明矣哉禹因娶塗山謂之女嬌世本名女

嬀大戴禮記作女嬌氏

禹傷父功不成循江沂河盡濟甄淮七

年功未及成乃按黃帝中經歷蓋聖人所記曰在于九
山東南天柱號曰宛委赤帝在闕其巖之巔承以文王
覆以盤石其書金簡青玉爲字編以白銀皆琢其文禹
乃東巡登衡嶽血白馬以祭不幸所求禹乃登山仰天
而嘯因夢見赤繡衣男子自稱元夷蒼水使者聞帝使
文命于斯故來候之非厥歲月將告以期無爲戲吟故
倚歌覆斧之山東顧謂禹曰欲得我山神書者齋于黃

帝巖嶽之下三月庚子登山發石金簡之書存矣禹退
又齋三月庚子登宛委山發金簡之書案金簡玉字得
通水之理

呂氏春秋禹行功見塗山之女禹未之遇而巡省南土
塗山氏之女乃令其妾待禹于塗山之陽女乃作歌歌
曰候人兮猗實始作爲南音

拾遺記鯀治水九載無績自沈于羽淵化爲元魚羽淵
與河海通源海民于羽山之中修立鯀廟四時以致祭
祀常見元魚跳躍而出至舜命禹疏川奠岳濟巨海則
龍鼉而爲梁踰翠岑則神龍而爲馭行徧日月之墟唯
不踐羽山之地

鹽鐵論禹蹙洪水身親其勞澤行路宿過門不入當此之時簪墮不掇冠掛不顧

古岳瀆經禹治水三至桐柏山驚風迅雷石號木鳴五伯擁川天老肅兵不能興禹怒召集百靈授命夔龍桐柏千君長稽首請命禹因囚鴻豕氏商章氏兜氏盧氏犁婁氏乃獲淮渦水神名巫支祈善應對言語辨江淮之淺深原隰之遠近形若獼猴力踰九象疾奔輕利倏忽閒視不可久禹乃授之章律不能制授之烏木田不能制授之庚辰能制頸鎖大索鼻穿金鈴徙之淮陽之龜山足下淮永安流

六經奧論昔鯀治水汨陳五行禹之治水順五行之序

一曰水禹治水自冀州始冀爲帝都在北方屬水故冀在先水生木木屬東方故次兗次青次徐皆東方也木生火火屬南方故次揚次荆皆南方也火生土土屬中央故次豫豫居天下之中也土生金金屬西方故終之以梁雍焉

鬻子禹之治天下也以五聲聽門懸鐘鼓鐸磬而置鞀以得四海之士爲銘于龔虞曰教寡人以道者擊鼓教寡人以義者擊鐘教寡人以事者振鐸語寡人以憂者擊磬語寡人以獄訟者揮鞀此之謂五聲是以禹嘗據一饋而七十起四海之士皆至禹之治天下也得臯陶杜子業旣子施子黯季子甯然子湛輕子玉得七大

夫以治天下天下治

漢書禹收九牧之金鑄九鼎象九州皆嘗醵享上帝鬼神其空足曰鬲以象三德饗承天祐

困學紀聞成相曰禹傅土平天下躬親爲民行勞苦得益臯陶橫革直成爲輔注云橫革直成未聞嘗考呂氏春秋云得陶化益眞窺橫革之交五人佐禹故功績銘乎金石著于盤盂陶卽臯陶也化益卽伯益也眞窺卽直成也橫革卽橫革也皆禹輔佐之名

水經注會稽山上有禹廟昔大禹東巡崩于會稽因葬其地鳥爲之耘春拔草根秋啄其穢山東有井深不見底卽禹穴也

史記禹會諸侯江南計功而崩因葬焉命曰會稽會稽者會計也

說文禹葬會稽桐棺三寸葛以繒之

人表考禹本書作命

師古曰古禹字

路史作璽華陽國志曰聖

禹書帝驗曰姒戎文禹淮南子注禹母感石而生路史

則云獲石服媚之而孕孕十四月背剖而生禹于西羌

參之星精長九尺九寸耳三漏長頸鳥喙河目駢齒虎

鼻大口疾行先左在位八年年百歲都安邑

案史正

義三國蜀志華陽國志吳越春秋竝言禹生石紐鄉爲

蜀之汶山廣柔人然古帝王多起冀方其時蜀又不與

中國通且鯀娶有莘氏女莘在陳留其封于崇爲今鄆

縣相去不甚遠何緣家居蜀土攷世紀禹生石均路史注有人出石夷引隨巢子云禹生崑石又言隨巢謂生碣石之東然則所稱石夷石均崑石者指崑崙碣石戎夷之地與後書戴良傳言禹生西羌合世人傳會其說移于蜀之石紐也

有娥

古今人表列上中作簡邊

毛傳有娥契母也

說文娥帝高辛之妃契母號也

正義曰有娥契母之姓婦人以姓爲字故云有娥

世本帝嚳次妃有娥氏女曰簡狄生契

列女傳簡狄有娥氏之長女也

呂氏春秋有娥氏有二佚女爲之九成之臺飲食必以
鼓帝令燕往視之鳴若謚隘二女愛而爭搏之覆以玉
筐少選發而視之燕遺二卵北飛遂不返二女作歌一
終曰燕燕往飛實始作爲北音

拾遺記商之始也有神女簡狄遊于桑野見黑鳥遺卵
于地有五色文作八百字簡狄拾之夜夢神母謂之曰
爾懷此卵卽生聖子以繼金德狄乃懷卵一年而有娠
經十四月而生契祚以八百叶卵之文也

世本古義有娥契母家所封國也史記言桀敗于有娥
之墟其地在陝號閒有娥氏有二女長曰東逝次曰建
庇東逝爲嚳次妃是爲簡翟故屈原云簡翟在臺嚳何

言曰族者卷第二
三
宜乙鳥致貽女何喜又云高辛氏之靈盛兮遭乙鳥而致貽古書之存者言簡翟未嘗不及于魯譙周謂契生堯代舜始舉之必非魯子羅泌闢之何所疑邪

人表考簡湯簡路史作東湯帝繫記作狄索隱作易淮南子作翟有娥氏女月令注疏曰娥簡亦曰簡妃後王以爲媒官謂之高媒

元王

古今人表列上中作尚

毛傳元王契也

鄭箋承黑帝而立子故謂契爲元王

正義曰鄭以契不爲王元又非諡解其稱元之意元黑色之別以其承黑帝子故謂元王國語云元王勤商十

四世而興元王爲契明矣是其爲王之祖故呼爲王非追號爲王也

昌契握云元鳥翔水遺卵流城簡狄吞之生契封商帝王世紀簡狄剖背生契

論衡高母吞燕卵而生契故殷姓曰子

詩補傳以契爲元王以志元鳥之祥猶后稷之名以棄也古人質朴故有此稱

李樛曰契未爲天子而乃稱王者以其爲王之祖也謂之元王者歐陽公言元深微之稱也老子曰元之又元此說得之

世本古義元者幽遠之義稱契爲元王亦猶曾孫之下

爲元孫蓋以其爲遠祖而名之或謂其生因元鳥降得名而鄭又謂黑帝所感生故以元稱皆不可信

人表考尙本作契說文作僕以元鳥子生故姓子稱曰元王封于商又居蕃

按契以卵生當从毛氏春分元鳥至日簡狄祈于郊禱而得之說爲正通鑑前編亦云古人以元鳥至之日祀于高禘以祈子簡狄以是日祈焉而孕故傳述其感生之祥吞卵之說未可盡信

相土

古今人表列上下

毛傳相土契孫也

鄭箋相土居夏后之世承契之業入爲王官之伯出長

諸侯

正義曰相土是昭明之子契之孫也契封商國相土嗣之止爲一國之君不得威行海外故知入爲王官之伯出長諸侯王肅云相土能繼契四海之外截然整齊而治言有烈烈之威則相土在夏爲司馬之職掌征伐也世本相土作乘馬

世本古義案竹書載帝相十五年商侯相土作乘馬遂遷于商邱與左傳言陶唐氏火正閼伯居商邱相土因之者合其曰作乘馬則此詩所詠也乘馬卽甸賦也班固漢志謂殷周以兵定天下立司馬之官設六軍之衆因井田而制軍賦是謂乘馬之法今據竹書所載則乘

馬之法夏后之世相土固先爲之矣

人表考相土世本及竹書作相土

土土古通寫

荀子稱乘杜

杜與土同以其作乘馬之法故謂之乘杜居商邱故曰商侯

案呂覽乘雅

作駕注雅一作持疑皆杜字之譌

武王

毛傳武王湯也

史記湯興師率諸侯自把鉞以伐昆吾遂伐桀作湯誓
于是湯曰吾甚武號曰武王

那正義稱湯爲武王者以其伐桀革命成就武功故以
武名之非其號諡也

夏桀

古今人表列下中作癸

史記帝發崩子帝履癸立是爲桀桀不務德而武傷百姓百姓弗堪湯伐夏桀走鳴條遂放而死

國語桀伐有施有施人以妹喜女焉

楚辭注夏桀征伐蒙山之國而得妹嬀

列女傳桀棄禮儀淫于婦人收倡優侏儒狎徒能爲奇偉戲者聚之于旁造爛漫之樂日夜與末喜及宮女飲酒無有休時置末喜于膝上聽用其言爲酒池可以運舟一鼓而牛飲者三千人藉其頭而飲之于酒池醉而溺死者未喜笑之以爲樂

帝王世紀妹喜好聞裂繒之聲爲發繒裂之以順適其意湯來伐桀以乙卯日戰于鳴條之野桀未戰而敗

績乃與妹喜及諸嬖妾同舟浮海奔于南巢之山而死
新序桀作瑤臺罷民力殫民財爲酒池糟隄縱靡靡之
樂羣臣相持而歌曰江水沛沛兮舟楫敗兮我王廢兮
趣歸薄兮薄亦大兮又曰樂兮樂兮四牡蹻兮六轡沃
兮去不善而從善何不樂兮伊尹知天命之至舉觴而
告桀曰君王不聽臣之言亡無日矣桀拍然而作啞然
而笑曰子何妖言吾有天下如天之有日也日有亡乎
日亡吾亦亡矣

歸藏桀筮伐有唐枚于熒惑曰不吉不利出征惟利安
處彼爲狸我爲鼠勿用作事恐傷其父

博物志夏桀之時爲長夜宮于深谷之中男女雜處十

旬不出聽政天乃大風揚沙一夕填此宮谷又爲石室
瑤臺關龍逢諫桀以爲妖言而殺之桀作瓦屋

新書桀自謂天父

淮南子桀之力制船伸鉤索鐵歛金椎移大犧水殺黿
鼉陸捕熊羆桀囚于焦門而不能自非其所行而悔
不殺湯于夏臺

呂氏春秋夏太史令終古出其圖法執而泣之夏桀迷
惑暴亂愈甚太史令終古乃出奔如商

繹史年表桀無道成湯伐之放南巢在位五十一年或
云三十一年

人表考癸一名桀長巨姦美垂腴尺餘筋力越勁自謂

天父湯放于南巢以乙卯日亡三年卒亭山 案此表及竹書單稱癸甚是史誤多履字湯名曰履豈有君臣同名之理

阿衡

古今人表列上中作伊尹

毛傳阿衡伊尹也

鄭箋阿倚衡平也伊尹湯所依倚而取平故以爲官名正義曰伊是其氏尹正也言其能正天下故謂之伊尹阿衡其官名也君奭注云伊尹名摯湯以爲阿衡至太甲改曰保衡阿衡保衡皆公官此言卿士者二公兼卿士也

呂氏春秋有佻氏女子採桑得嬰兒于空桑之中獻之

其君其君令焮人養之察其所以然曰其母居伊水之上孕夢有神告之曰曰出水而東走毋顧明日視曰出水告其鄰東走十里而顧其邑盡爲水身因化爲空桑故命之曰伊尹此伊尹生空桑之故也

荀子伊尹之狀面無須臾

宋書符瑞志伊摯將應湯命夢乘船過日月之旁

墨子湯將往見伊尹令彭氏之子御彭氏之子半道而問曰君將何之湯曰將往見伊尹彭氏之子曰伊尹天下之賤人也君若欲見之亦令召問焉彼受賜矣湯曰非女所知也今有藥于此食之則耳加聰目加明則吾必說而強食之今夫伊尹之于我國也譬之良醫善藥

言上族卷第二
也而子不欲我見伊尹是子不欲我善也因下彭氏之
子不使御

史記或曰伊尹處士湯使人聘迎之五反然後肯往從

湯言素王及九主之事湯舉任以國政

案劉向別錄九主者有法君專

君授君勞君等君寄君破君國君三歲社君凡九品圖畫其形

汜勝之書湯有旱災伊尹作爲區田教民糞種負水澆稼收至畝百石

皇王大紀伊尹言于王發莊山之金鑄幣通有無于四方以賑救之民是以不困

帝王世紀沃丁八年伊尹卒卒年百有餘歲大霧三日沃丁葬之以天子禮祀以太宰親自臨喪三年以報大

德

書序孔傳伊尹既致仕老終以三公禮葬

竹書紀年沃丁八年祠保衡

漢書音義臣瓚案湯居亳今濟陰薄縣是也今薄有湯冢已氏有伊尹冢皆相近

困學紀聞陸士衡豪士賦序伊尹抱明允以嬰戮蓋惑于汲冢紀年之妄說也皇甫謐云伊尹百有餘歲李樗曰此詩言禘其祖之所自出而末言實維阿衡蘇氏云阿衡亦與禘祭意或然也

世本古義阿衡官名郝敬云如太公之號尙父也按此宰相之位上卿之職太甲改官名爲保衡書君奭篇成

湯旣受命時則有若伊尹在太甲時則有若保衡以伊尹保衡是一人故一稱其名一稱其官也

人表考伊氏尹字名摯力牧之後母居伊水上生于空桑黑而短蓬而髯豐上兌下僂身下聲爲湯右相易林曰伊子亦曰伊伯文選曰伊生後書曰伊公阿衡隸釋作猗衡文選曰太阿年百餘歲豕在濟陰已氏平利鄉按史記帝王世紀新語韓非子諸書俱言伊尹爲有莘媵臣負鼎說湯固與孟子說背馳呂氏春秋但云有佚氏爲媵送女其說亦誣墨子乃謂爲有莘氏女師鶡冠子以伊尹爲酒保更荒誕不經至若伊尹之放太甲自孟子辯之遂爲千古定案羅泌曰周公之

抱沖子太甲之居桐皆在諒陰時元祀十二月王始居陰百官聽于冢宰此喪之常紀非攝也謂之放者自內而外之辭抗世子之謂云爾非廢也三年復歸于亳是起復之時非再立也羅氏之說甚正汲冢紀年謂伊尹放太甲而自立則尤妄矣

殷武

殷武

毛傳殷武殷王武丁也

正義曰述高宗而言殷武故定本直云殷武武丁也

世本古義商自盤庚遷殷始改國號曰殷武丁名昭小乙之子成湯十四世孫廟號高宗鄒氏云商家賢聖之

詩氏族考卷第六
君惟載旆之湯及奮伐之丁以武特聞

詩氏族考卷第六

受業海昌蔣光煦校